

## **Tulayi myanda yenu yoso kwadi, mwanda aye nabene enulama**

« Bimusodya bibidi tabyudishibwa kwikuta dimune su? Suunga kimune takyanapone paashi kushii Sheenu kukumiina; bwenu'nwe, na nyene ya ku mitwe yeenu ngibadikwe. Byabya tanutshinanga: anwe nwi bakile bimusodya bibungi kineemo. Talaayi kalolo manganga; taakuna suunga kuwumbula; taena bipako suunga mikulu; n'Efile-Mukulu eadisha: Nwina muulo ukata kukila byoni! » (Mateo 10:29-31, Luuka 12:24)

## **Tanulengulangayi buntu bw'Efile-Mukulu**

« Kutala, atwe namu pakwikala ku wawa mufubo umune, atukankamika, byanushaa kulengulula buntu bw'Efile-Mukulu, bwanudi batambule; (mwanda amba'shi: Mu kipindji kilombane napushiishe luteko loobe, na mwifuku dya kipandjilo nakukwashiishe. Talanga, binobino ni nkipindji kii buwa: talanga binobino ni ndeelo efuku dya kipandjilo) ».

(2 Bena Kolente 6:1-2)

« Na pabebatushiishe paasha, bambile'shi: Ba mwanana, nkite kini byandya kupashiibwa? Na babambile'shi: Kumina Fumu Yesu, ngi okapashiibwa, obe na shibo yobe. Na babamulungwile eyi dya Fumu, n'anka booso babaadi mu shibo yaye. Na bebatwesheshe munda mwa shibo yaye, na bebapeele bya kudya; na pabakuminine Efile-Mukulu, basepeleele na shibo yaye yoso ». (Mikitshino 16:30-32,34)

« Mwanda kukumiina mwishimba akufwishaa kululama, na kukanwa akushinkamishaa kipandjilo. Mwanda bifundwe abyamba'shi: ooso akakumiina mwadi takakwatshiswa buufu nya. Mwanda takwi kwilekena munkatshi mwa bena Yuda na bena Ngidiki, mwanda aye Ngi Fumu umune bwa booso ni mpeta kwi booso abamwitanyina; mwanda ooso akayitanyina eshina dya Mwanana akapashiibwa ».

(Looma 10:8-13)

## **Kifulo ky'Efile-Mukulu**



## **Kifulo ky'Efile-Mukulu**

### **Kifulo ky'Efile-Mukulu kwi ba pa senga**

« Na bu bibebosheshe Mose nyoka mu mapya a kabaalala, ngi abitungu mwana a muntu eboshiibwe, pamwanda wa'shi oso akumiina mwadi takafu, anka akekala na muwa wa yikalayika. Mwanda Efile-Mukulu bakishekiishe kifulo kwi ba pa senga, bebapeele mwana'ye'eleka'shi oso yawa akumiina mwadi takashimina, anka ekala na muwa wa yikalayika ».

(Yoano 3:14-16)

« Fumu Yesu akula'shi: Mwanda kino ngi kikyebe kya Yaya: Oso ashinguula mwana na akumiina mwadi, apete muwa wa yikalayika, na ami, nakamubuusha mu efuku dya fudiilo ». (Yoano 6:40)

« Anka Efile-Mukulu bashinkamisha kifulo kyaye nabeene kwatudi, kwamba'shi, pabatudi tukii balwiishi, Kilisto bafwiile pamwanda weetu ».

(Looma 5:8)

« Atukapanduka namini, su atubengyeshena kino kipandjilo kibino bukata, akyo kibabangile kulambukishiibwa kwi Fumu, kibabetushinkamishishe kwi baaba babamutemeshanga ».

(Bena Ebeleo 2:3)

### **Kifuloky'Efile-Mukulu kwi mwilo waye**

« Talaayi bukata bwa kifulo kitupe Yaya, byatudya kwitanyinwa'shi mbana b'Efile-Mukulu; ngi pa wawa mwanda senga tayituwuku, mwanda tangimuwukye » « Na, byanudi'shi nwi bana, Efile-Mukulu batumine Kikudi kya mwanaaye mu mashimba eetu, pa kwela musaase'shi: Abba, Yaya ».

(1 Yoano 3:1, Bena Galateya 4:6)

« Obe Mwanana, bumuntu boobe bwi bukata bu eyilu! Atwe baana ba bantu, atusukilaa muushi mwa mbaba yobe, atwikuta bidibwa bilumbulukye bya kodi, na we tutomeshaa ku kasulo ka buwa bobbe, mwanda obe we nsulo ya muwa; etata dyobe adimunyikila myuwa yetu ».

« Ayikalayika nyi mulami ande; byabya, tshina kyankutwa. Eyendo, okekala ondesha bumuntu bobbe na kifulo kyobe mpaa na ku nfudiilo kwa muwa wande ».

(Ngono 36:7-9; 23:1,6)

## **Efile-Mukulu muleeshe kifulo kyaye kwatudi**

« Mu bino mubalessiibwa kifulo ki'Efile-Mukulu mwatudi, ngi'shi Efile-Mukulu batumine mwana'ye eleka pa senga, mwanda wa'shi twikale na muwa mwadi; Mu bino, ngi mwaleesha kifulo kushii muutwe, kufula Efile-Mukulu anka mu bibetufuule'ye na kwi tutumina mwanaaye [mwanda wa kwikala] mulambu wa kusuula milwisho yeetu ».

(1 Yoano 4:9-10)

« Mwanda efuto dya bubi ni ndufu; anka buntu bwa lusa lw'Efile-Mukulu, ni muwa wa yikalayika mu Kilisto Yesu fumwetu ». « Mwanda nwibapashiibwe pa buntu, pa lukumiino, na byabya tambifikye kwanudi, ni mbuntu bw'Efile-Mukulu; kushii pa mwanda wa mikitshino kupela'shi tala muntu etumbika ».

(Looma 6:23, Bena Efeso 2:8,9)

### **Kifulo kya Yesu Kilisto**

« Fumu Yesu akula'shi: Bu binfule Yaya, ami namu nemwinufule; ikalaayi mu kifulo kyande. Takwi muntu ena kifulo kikile kino bukata nya, muntu kuleka muwa waye pamwanda wa Bakuuku baye. Nwi Bakuuku bande su anukitshi kyoso kyanenwamba ».

(Yoano 15:9,13,14)

« Nenulekyela kufukama; nenupa kufukama kwande; ami ntanenupa bu abipeyeshena bena senga nya. Eshimba dyenu taditshinkishibwanga suunga kwikala na moo nya. Talanga, nemwimane pa kibelo na nakokola: su muntu apusha eyi dyande na ashitula kiibi, nakatwele mwaye na nakadi naye, naye akadi'nami ».

(Yoano 14:27, Kileseso 3:20)

« Nani aketulamuuna ku kifulo kya Kilisto? Ni nkubingwabingwa su, mpombo su, ni nkulondwa londwa su, ni sala su, ni muswa su, masaku su, ndupete lwa ngoshi su? Mwanda nashinkamisha'shi suunga lufu, suunga muwa, suunga ba mwikewulu, suunga ma fumu, suunga bintu bii binobino, suunga bintu bikyabifiki, suunga makome, suunga mbula bwa mwiwulu, suunga bula bwa muushi, suunga kingi kipangwa kyoso, takii bya kuketulamuuna ku kifulo ki'Efile-Mukulu, kii mu Kilisto Yesu, Fumwetu ».

(Looma 8:35,38,39)